
Cynulliad Cenedlaethol Cymru

Y Pwyllgor Plant, Pobl Ifanc ac Addysg

National Assembly for Wales

Children, Young People and Education Committee

Kirsty Williams AC
Ysgrifennydd y Cabinet dros Addysg
Drwy e-bost

6 Gorffennaf 2018

Annwyl Kirsty

Diolch am ddod i gyfarfod y Pwyllgor Plant, Pobl Ifanc ac Addysg ar 28 Mehefin 2018. Cytunodd aelodau'r Pwyllgor fod y sesiwn yn un diddorol a defnyddiol wrth inni graffu ar gynnydd gan Lywodraeth Cymru mewn sawl maes polisi, gan gynnwys ambell un o'r deg o flaenoriaethau o ran addysg a gytunwyd gennych chi a'r Prif Weinidog ym mis Mehefin 2016.

Fodd bynnag, hoffai'r Pwyllgor ofyn am ragor o wybodaeth am rai meysydd a drafodwyd yn y cyfarfod, gan ofyn ichi gadarnhau rhai eitemau y gwnaethoch gytuno i'w darparu i ni.

Cefnogaeth ar gyfer dysgwyr o leiafrifoedd ethnig a dysgwyr o gymunedau Sipsiwn, Roma a Theithwyr

Fel y byddwch yn gwybod o'r ymchwiliad i'r *Grant gwella addysg: Plant Sipsiwn, Roma a Theithwyr, a phlant o leiafrifoedd ethnig*, mae'r Pwyllgor wedi pwysleisio pwysigrwydd cefnogi'r grwpiau hyn o ddysgwyr oherwydd, yn achos dysgwyr o gymunedau Sipsiwn, Roma a Theithwyr yn benodol, maent yn grwpiau difreintiedig iawn sydd â lefel gymharol isel o gyrhaeddiad.

Mae'r Pwyllgor yn croesawu penderfyniad Llywodraeth Cymru i ddyrannu £8.5 miliwn o arian pontio i gefnogi'r grwpiau hyn o ddysgwyr i liniaru effaith tynnu



£13.1 miliwn o'r Grant Gwella Addysg yn 2018–19. Rydych wedi dweud mai eich bwriad yw darparu £8.7 miliwn o arian pontio ychwanegol yn 2019–20.

Fodd bynnag, mae'r Pwyllgor o'r farn bod yr angen i Lywodraeth Cymru wneud hyn, ar ôl dileu'r cyllid yn wreiddiol i sicrhau bod adnoddau ar gael o fewn y Setliad Llywodraeth Leol i ddiogelu cyllidebau ysgolion, yn dangos diffygion sylweddol y penderfyniad gwreiddiol. Mae gan y Pwyllgor yr un pryderon yn achos dileu'r Grant Gwisg Ysgol gwerth £700,000 a'i ddisodli'n hwyrach â Chronfa Mynediad y Grant Datblygu Disgyblion, sy'n werth £1.7 miliwn. Mae'r Pwyllgor o'r farn y byddai wedi bod yn well defnyddio arian o'r cronfeydd wrthgefn ar y cychwyn i ychwanegu at gyllid llywodraeth leol ar gyfer ysgolion, yn hytrach na chymryd arian o grantiau addysg ac yna defnyddio'r cronfeydd wrthgefn i adfer y grantiau hyn.

Dim ond £5 miliwn o'r arian pontio gwerth £8.7 miliwn ar gyfer 2018–19 oedd wedi'i nodi yng Nghyllideb Atodol 2018–19, a gyhoeddwyd ar 19 Mehefin 2018. Gwnaethoch gadarnhau y bydd y £3.7 miliwn sy'n weddill yn cael ei nodi yn yr ail Gyllideb Atodol, ac y bydd yr arian hwn naill ai'n dod o'r prif grŵp gwariant Addysg neu o'r cronfeydd wrthgefn canolog.

Yn ystod y cyfarfod ar 28 Mehefin 2018, gwnaethoch gytuno i ddarparu:

- Copïau o unrhyw asesiadau o effaith, gan gynnwys Asesiadau o'r Effaith ar Hawliau Plant, a gynhelir mewn perthynas â phenderfyniadau i newid y ffordd y rhoddir cefnogaeth i ddysgwyr o leiafrifoedd ethnig a dysgwyr o gymunedau Sipsiwn, Roma a Theithwyr;
- Nodyn ar sefyllfa gwasanaethau addysg i Deithwyr ledled Cymru; er enghraifft, newidiadau yn niferoedd staff a chyllid awdurdodau lleol ar gyfer y gwasanaethau hyn.



Maint dosbarthiadau babanod

Yn ystod y drafodaeth ar eich blaenoriaeth o leihau maint dosbarthiadau babanod, gwnaethoch gytuno i ddarparu:

- Nodyn ar yr achosion busnes a gyflwynwyd gan awdurdodau lleol ar gyfer yr elfen Refeniw gwerth £16 miliwn o'r cyllid i leihau maint dosbarthiadau babanod a sut y mae'r rhain yn cymharu â'r symiau a ddyrannwyd;
- Nodyn ar y dadansoddiad o'r elfen Gyfalaf gwerth £20 miliwn o'r cyllid a ddyrannwyd;
- Nodyn ar delerau ac amodau elfennau Refeniw a Chyfalaf y cyllid i leihau maint dosbarthiadau babanod;
- Ffigurau yn dangos faint o ddosbarthiadau babanod sy'n cynnwys mwy na 25 o ddisgyblion ar hyn o bryd, faint o ddisgyblion sydd yn y dosbarthiadau hyn a'r sefyllfa gyfatebol ar ôl i gyfnod y polisi hwn ddod i ben (diwedd tymor y Cynulliad hwn).

Cwricwlwm Newydd i Gymru

Mae'r Pwyllgor yn ddiolchgar am eich llythyr dyddiedig 26 Mehefin 2018, a gyhoeddwyd ochr yn ochr â'ch Datganiad Cabinet ar yr un diwrnod, gan ddarparu cyfeiriadau a lincs i wahanol ffynonellau o wybodaeth. Gwnaethoch ddweud y byddech yn anfon unrhyw wybodaeth ychwanegol at y Pwyllgor am gynnwys y Meysydd Dysgu a Phrofiad newydd wrth iddi ddod i law. Edrychwn ymlaen at dderbyn unrhyw wybodaeth arall o'r fath a allai fod ar gael.

Yn ystod y cyfarfod, gwnaethoch gadarnhau eich bod yn meddwl y bydd deddfwriaeth sylfaenol ynghylch y cwricwlwm newydd yn cael ei chyflwyno ym mlwyddyn 4 rhaglen ddeddfwriaethol Llywodraeth Cymru. Byddai'r Pwyllgor yn ddiolchgar pe gallech roi rhagor o fanylion am gynlluniau Llywodraeth Cymru ar hyn o bryd i gyflwyno deddfwriaeth sylfaenol i sefydlu Cwricwlwm newydd i Gymru.




Athrawon cyflenwi

Nododd y Pwyllgor o'ch tystiolaeth lafar nad oeddech yn bwriadu symud tuag at fodel athrawon cyflenwi cenedlaethol, er gwaethaf datganoli cyflog ac amodau athrawon. Byddwch yn ymwybodol bod y Pwyllgor blaenorol yn y pedwerydd Cynulliad wedi cynnal ymchwiliad i waith athrawon cyflenwi. Roedd yr argymhelliad cyffredinol yn galw ar Lywodraeth Cymru i edrych ar opsiynau ar gyfer cyflogi athrawon cyflenwi, gan gynnwys drwy gorff cenedlaethol.

Mae'r Pwyllgor yn edrych ymlaen at drafod y materion hyn mewn rhagor o fanylder wrth gynnal ymchwiliad arall i athrawon cyflenwi maes o law. Yn y cyfamser, byddai'r Pwyllgor yn ddiolchgar pe gallech roi gwybodaeth am y materion a ganlyn:

- Trosolwg cryno o'r opsiynau y mae Llywodraeth Cymru yn eu trafod ar gyfer modelau o ddarparu athrawon cyflenwi yn y dyfodol;
- Natur benodol cyflogaeth athrawon; hynny yw, a ydynt yn cael eu cyflogi gan ysgolion unigol neu awdurdodau lleol;
- I ba raddau y ceir unrhyw dystiolaeth fod dibyniaeth uwch ar athrawon cyflenwi mewn ysgolion sydd â dalgylchoedd difreintiedig a/neu ysgolion sy'n gweithio mewn amgylchiadau heriol.

Yn gywir



Lynne Neagle AC
Cadeirydd

